



Minister Mike de Meza:

Bonbini na director regional nobo pa Repsol

ORANJESTAD - Dialuna a tuma luga un reunion na den Sala di Consejo di Minister entre Minister Asuntunan Economico, Comunicacion, Energia y Medio Ambiente, Mike de Meza, oficialnan di Compania Arubano di Petroleo (CAP) cu ehecutivonan di Repsol di e oficinanan principal na Madrid y e oficinanan regional na Houston, unda cu a introduci na Aruba di e director regional nobo pa Repsol.

Minister de Meza a dispidi di Joseba Murillas bao di kende e gerencia di e proyecto di exploracion na Aruba a resorta

for di su cuminsamento na december di 2012. E mandatario a gradici e anterior Director di Exploracion Latino America pa su esfuersonan y a desea hopi exito den su funcion nobo. Na mes momento, Murillas y ehecutivonan di CAP a introduci Mikél Erquiaga como e director pa e division di exploracion pa Latino America y Caribe na Minister de Meza y Prome Minister Mike Eman.

Minister de Meza a expresa cu e proyecto di exploracion pa gas y petroleo den subsuelo di awanan teritorial di Aruba ta bayendo bon den e sentido cu e ta avansando bon y pa fin di aña 2015 e companianan lo dicidi si ta sigui cu

e siguiente paso. Esaki lo ta pa bora den e subsuelo como prueba pa wak si di berdad lo tin gas of zeta y si ta cumbini e partidonan envolvi pa sigui cu e proyecto.

Minister de Meza a splica cu e resultadonan cu nan ta analisando te awo no tin conclusion ainda y lo dura por lo menos un aña mas pa haya conclusion pa cu e proyecto aki. E proyecto di exploracion ta "on schedule".

Durante di e reunion a repasa diferente informacion, con ta bayendo cu e fase cu e proyecto ta aden actualmente y kico por spera den e proximo lunanan. Murillas a bisa

cu Repsol ta hopi contento cu con e actividadnan na Aruba ta progresando. Despues di e testnan sismico 2D y testnan sismico 3D, actualmente ta tumando pruebanan di e fondo di lama y ta spera di por tuma un decision tocante perforacion entre fin di 2015 y cuminsamento di 2016. "E ta un di e proyectonan cu ta progresando mas rapido di henter e cartera di Latino America y pa un gran parti esaki ta debi na e bon cooperacion cu nos ta ricibiendo di tur e autoridadnan di Aruba," Murillas a expresa.

E ehecutivo cu ta reemplazando Joseba Murillas esta Mikél Erquiaga tabata pa

promer biaha na Aruba y tabatin anteriormente e funcion di director di exploracion pa Europa y Oriente Medio. El a expresa cu hopi optimismo e ta sigui cu e proyecto y cu e ta spera cu e resultadonan ta positivo pa tur partido y cu por sigui padilanti. Repsol tin bon presencia den Latino America y Caribe. Pa cu produccion, e compania ta activo na Venezuela, Trinidad y Colombia y nan tin proyectonan di exploracion na Aruba, Colombia, Guyana y Trinidad. Recientemente Repsol a adkiri Talisman, cu ta pa e compania un activo importante na Colombia cu ta engrandece nan presencia den e region aki.